

Nunatsinni tarnip pissusaanik ilisimatusarnerup iluani ilinniarfimmik imaluunniit pikkorissaanernik pilersitsisoqarnissaannik pisariaqartitsineq kiisalu taakku aningaasaqarnikkut allaffissornikullu kingunerisassaas pillugit Naalakkersuisut nassuiaasioqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat, Mariane Paviassen Jensen, Paarma Lund Kreutzmann, Inuit Ataqtigiit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Siunnersuummut Naalakkersuisut sinnerlugit qujassuteqassaanga. Tarnikkut atugarissaarnerup qitiulluinnarnera suliniuteqarnerullu patajaannerulersinneqarnissaa, nunalu tamakkerlugu ikiorserneqartarnerup ajornannginnerulernissaa pitsaannerulersinneqarnissaalu qulakkeerniarlugit ilinniartitaaneq pingaarutilimmik inissisimasuusoq Naalakkersuisut isumaqatigaat.

Ullumikkut arlalinnik ilinniakkanik ilinniaqqiffissanillu neqerooruteqarpoq, matumani tarnikkut katsorsaasutut ilinniartitaaneq, tapersersortitut ilinniartitaaneq kiisalu perorsaanermik isumaginninnermillu ilinniartitaanerit, ilinniaqqinnerit pikkorissarnerillu assigiinngitsut ilanngullugit. Taakku assut pingaaruteqarput kisianni Kalaallit Nunaanni tarnip pissusaannik ilisimasallit sulianut ilisimasaannut suliniuteqarnerinullu ataatsimoorussamik pisariaqartitsinernut taakku matussusiisinnaanngillat.

Tarnip pissusaannik ilisimasallit suliutigut piginnaasaasa patajaallisarneqarnissaat pillugu kissaat Naalakkersuisut isumaqataaffigaat taamaattumillu nunani allani tarnip pissusaannik ilisimasalittut ilinniartitaanerit assingannik, ilisimatusarfittut qaffasissusilittut neqeroorummik, pilersitsinissamut periarfissat misissuiffigiumavaat. Taamaattumik Ilisimatusarfik tassaavoq ilinniartitaanermut pissusissamisoortumik aallaaviusussaq, taamaalilluni kalaallit isummersortarnerat aallaavigalugu atuagarsornikkut siammasissumik nunanilu tamalaani akuerineqarnermik ilaqartumik inerisarneqarsinnaassammat, matumani kulturi, oqaatsit inuiaqatigiinnilu atukkat ilinniartitaanerup ilaatut ilaatinneqarsinnaassallutik

Tunngavissamik aalajaatsumik suliarilluakkamillu qulakkeeriumalluni, Ilisimatusarfimmit suleqatigineqartartunillu attuumassutilinnik peqataaffigineqartumik suleqatigiissitamik Naalakkersuisut pilersitsiniarput. Suleqatigiissitap ilinniartitaanermik sananeqarnerit ilusilersukkat assigiinngitsut arlallit misissuiffigeqqissaassavai tamannalu aallaavigalugu qanoq pitsaanerpaamik tarnip pissusaannik ilisimasalittut ilinniartitaanermik, nunani tamalaani immikkut ilisimasalinnit peqataaffigineqartumik, Ilisimatusarfimmi pilersitsisoqarnissaanut ilusilersukkamik toqqaassalluni. Ilusilersugaq matuma kingorna Naalakkersuisut ilinniartitaanerup ingerlatsisussarsiornissaa pillugu aalajangiisinaanissaannut tunngaviliissaaq.

Naalakkersuisut taamatut oqaaseqarlutik allannguutissatut siunnersuut tullitut akuerisassanngorlugu saqqummiuppaat:

”Suleqatigiissitamik Ilisimatusarfimmit suleqatigisartakkaniillu attuumassuteqartunit peqataaffigineqartumik Naalakkersuisut pilersitsissasut Inatsisartut peqqussuteqarput. Suleqatigiissitaq Ilisimatusarfimmi tarnip pissusaanik ilisimasalittut ilinniarnermik Kalaallit Nunaanni pissutsinik aallaavilimmik pilersitsinermut atugassamik periusissiusaaq ilutigalugulu nunanit tamalaanit ilisimasalinnit ilinniartitaanerup ilusaanik qanoq peqataatitsisoqarsinnaanersoq qulajaassaaq. Periuseq tarnip pissusaanik ilinniarnerp neqeroorutaasinnaaneranik Naalakkersuisut aalajangiisinnaanerinut tunngaviliissaaq”.